

CYFARFOD	Pwyllgor Ymgynghorol Harbwr Abermaw
DYDDIAD	19 Mawrth 2024
TEITL	Diweddariad ar Faterion Rheoli'r Harbwr
AWDUR	Uwch Swyddog Harbyrau

1. Cyflwyniad.

- Prif swyddogaeth y Pwyllgor yw ystyried, trafod a chynghori ar faterion sy'n ymwneud â rheoli, diogelu a datblygu'r Harbwr a derbyn sylwadau'r Aelodau ar faterion sy'n ymwneud â Harbwr Abermaw.
- Diben yr adroddiad hwn yw rhoi diweddariad byr i'r Pwyllgor ar faterion yr harbwr am y cyfnod rhwng mis Hydref 2023 a Mawrth 2024, er mwyn cael adborth gan yr aelodau ar faterion diogelwch a materion gweithredol yr Harbwr.
- Sefydlwyd Pwyllgorau Harbwr Abermaw, Aberdyfi a Phwllheli dan adran 102(4) Deddf Llywodraeth Leol 1972. Mae Pwyllgor Harbwr Porthmadog yn Bwyllgor Harbwr statudol, a sefydlwyd yn unol ag adran 6(2) (a-j) Gorchymyn Addasu Harbwr Porthmadog 1998.

2. Angorfeydd Abermaw a Chofrestru Cychod.

- Disgwylir i gwsmeriaid sy'n dymuno cael angorfa yn yr harbwr neu gofrestru eu cychod dŵr ar gyfer y tymor sydd i ddod gwblhau'r broses ar-lein yn brydlon drwy wefan Cyngor Gwynedd, cyn gynted ag y bydd y ffioedd priodol wedi'u cadarnhau. Wedi hynny, dylai cwsmeriaid angorfeydd gysylltu â'r Harbwrfeistr i gadarnhau eu lleoliad angori yn yr harbwr.
- Yn dilyn archwiliad o'r afon gan yr Harbwrfeistr a'i Gymhorthydd, bydd angorfeydd yr ymwelwyr a weithredir gan yr Awdurdod Harbwr wedi'u lleoli'n addas mewn dŵr dwfn cyn dechrau tymor prysur yr haf. Cwblheir y gwaith ar yr angorfeydd gan contractwr angorfeydd a benodwyd yn lleol.
- Mae'r Gwasanaeth yn edrych ymlaen yn obeithiol at gyfnod prysur yr haf eleni ac y bydd cwsmeriaid yr harbwr ac ymwelwyr yn mwynhau eu hamser yn amgylchedd yr harbwr.

3. Cod Diogelwch Morol Porthladdoedd.

- Mae'r Cod Diogelwch Morol Porthladdoedd (PMSC) yn amlinellu'r safon genedlaethol ar gyfer pob agwedd o ddiogelwch morol porthladdoedd. Ei nod yw gwella diogelwch i bawb sy'n defnyddio neu'n gweithio yn yr amgylchedd morol porthladdoedd. Mae'n berthnasol i bob Awdurdod Harbwr Statudol.

Mae'r Cod yn cynrychioli arfer dda a gydnabyddir gan amrediad eang o randdeiliaid yn y diwydiant ac mae Cyngor Gwynedd yn deall y gall peidio â chadw at arfer dda fod yn arwydd o awdurdod harbwr sy'n torri dyletswyddau cyfreithiol penodol.

- Mae'r Gwasanaeth yn adolygu'r Cod Diogelwch Morol yn rheolaidd ar gyfer yr harbyrau dan ei awdurdodaeth er mwyn sicrhau ei fod yn parhau i gydymffurfio'n llawn â gofynion presennol y Cod. Fel rhan o'r broses adolygu, mae'n angenrheidiol derbyn sylwadau a barn Aelodau'r Pwyllgor Ymgynghorol ar ba mor addas yw'r Cod Diogelwch Morol ac i dderbyn sylwadau'n rheolaidd ar ei gynnwys, yn benodol o ran perthnasedd gyda gweithgarwch yr harbwr, cymhorthion mordwyo, addasrwydd is-ddeddfau, materion diogelwch a gwaith dydd-i-ddydd cyffredinol yn Harbwr Abermaw.

4. Materion Staffio.

- 4.1 Mae'r Harbwrfeistr Mr Daniel Cartwright a'i gymhorthydd Mr Kane Triggs wedi ymgymryd â rhaglen o waith cynnal a chadw yn yr harbwr dros y gaeaf, yn ychwanegol i'r gwaith a wnaed i gefnogi staff harbyrau Aberdyfi a Phorthmadog.
- 4.2 Hysbysebwyd swydd barhaol newydd ar gyfer Swyddog Traeth i gynorthwyo Swyddogion yr Harbwr gyda gwaith ar y traethau lleol rhwng Abermaw ac Aberdyfi. Yn dilyn proses gyfweld, bydd yr ymgeisydd llwyddiannus, Ms Nicola Salt, yn cychwyn gweithio gyda'r Gwasanaeth ar 1 Mawrth 2024. Yn ôl yr arfer, bydd Wardeiniaid Traeth tymhorol hefyd yn cael eu penodi i weithio ar y traeth yn Abermaw cyn dechrau cyfnod prysur yr haf.

5. Materion Ariannol.

- 5.1 Darperir crynodeb bras o gyllideb yr harbwr a'r sefyllfa ariannol gyfredol hyd at ddiwedd y chwarter gan y Rheolwr Gwasanaeth Morol.
- 5.2 Yn ystod y gaeaf, roedd yn angenrheidiol ymrwymo adnoddau ariannol ar gyfer yr hyn a ganlyn;
- Cynnal a chadw cymhorthion mordwyo a goleufeydd
 - Cynnal a chadw offer a chyfarpar yr harbwr
 - Cynnal a chadw angorfeydd y Cyngor
 - Cynnal a chadw a gweithredu cwch patrôl Powercat yr harbwr
 - Cynnal a chadw tiroedd a meinciau

5.3 Ffioedd a Thaliadau. 2024/25.

O ran ffioedd a thaliadau arfaethedig ar gyfer Harbwr Abermaw, ynghyd â ffioedd lansio ar gyfer Cychod Pŵer a Chychod Dŵr Personol ar gyfer tymor 2024/25, fel ag o'r blaen, mae'r Gwasanaeth yn bwriadu addasu'r ffioedd yn unol â chyfradd chwyddiant ar y pryd. Fodd bynnag, hyd yma, ni wnaed unrhyw benderfyniad ynghylch lefel y ffioedd ar gyfer y tymor nesaf.

6. **Adroddiad yr Harbwrfeistr.** Bydd Harbwrfeistr Abermaw yn rhoi crynodeb o'r materion Mordwyo a Gweithredol a wnaed ac a brofwyd yn y cyfnod rhwng mis Hydref 2023 a Mawrth 2024, gan gynnwys materion cynnal a chadw. Mae copi o'i adroddiad ynghlwm.